

四天王觀察人天品第十一

爾時多聞天王。持國天王。增長天王。廣目天王。俱從座起。偏袒右肩。右膝著地。合掌向佛。禮佛足已。白言。世尊。是金光明最勝王經。一切諸佛。常念觀察。一切菩薩之所恭敬。一切天龍常所供養。及諸天眾常生歡喜。一切護世稱揚讚歎。聲聞獨覺皆共受持。悉能明照諸天宮殿。能與一切眾生殊勝安樂。止息地獄餓鬼傍生諸趣苦惱。一切怖畏。悉能除殄。所有怨敵。尋即退散。飢饉惡時。能令豐稔。疾疫病苦。皆令蠲愈。一切災變百千苦惱。咸悉消滅。世尊。是金光明最勝王經。能為如是安隱。利樂饒益我等。惟願世尊。於大眾中。廣為宣說。我等四王。并諸眷屬。聞此

甘露無上法味。氣力充實。增益威光。精進勇猛。神通倍勝。世尊。我等四王修行正法。常說正法。以法化世。我等令彼天龍藥叉健闥婆阿蘇羅揭路荼俱槃荼緊那羅莫呼羅伽及諸人王。常以正法而化於世。遮去諸惡。所有鬼神。吸人精氣。無慈悲者。悉令遠去。世尊。我等四王與二十八部藥叉大將。并與無量百千藥叉。以淨天眼。過於世人。觀察擁護此瞻部洲。世尊。以此因緣。我等諸王名護世者。又復於此洲中。若有國王被他怨賊。常來侵擾。及多飢饉。疾疫流行。無量百千災厄之事。世尊。我等四王於此金光明最勝王經。恭敬供養。若有苾芻法師受持讀誦。我等四王共往覺悟。勸請其人。時彼法師由我神通覺悟力。故往彼國界。廣宣流布。是金光明微妙經典。由經力故。令彼無量百千衰惱災厄之

事悉皆除遣。世尊。若諸人王於其國內。有持是經。苾芻法師至彼國時。當知此經亦至其國。世尊。時彼國王應往法師處。聽其所說。聞已歡喜。於彼法師恭敬供養。深心擁護。令無憂惱。演說此經利益一切。世尊。以是經故。我等四王皆共一心護是人王及國人民。令離災患。常得安隱。世尊。若有苾芻。苾芻尼。鄒波索迦。鄒波斯迦。持是經者。時彼人王隨其所須。供給供養。令無乏少。我等四王令彼國主及以國人。悉皆安隱。遠離災患。世尊。若有受持讀誦是經典者。人王於此供養恭敬尊重讚歎。我等當令彼王於諸王中恭敬尊重最為第一。諸餘國王共所稱歎。大眾聞已歡喜受持。